

Mataitai i Lisayon Eskriptuat.

1. Fa'tinas i siñat i Kilu'os.
2. Taitai i Kredo (Manhongge yu' as Yu'os.)
3. Taitai i Tatañ-mami.
4. Taitai tres (3) Abe Maria (Si Yu'os unginegue)
5. Taitai i Gloria Patre (Umatuna i Tata Ya Hasso)
6. Anunsia i Fine'nana na misterio.
7. Taitai i intansion yon i Tatan-mami.
8. Mientras un tataitai kada hinasso taitai lokkue' unu na Abe Maria. (Si Yu'os unginegue)
9. Taitai i umatuna i Tata yan i tinaitai Fatima pat otso na tinaitai put i ukasion.
10. Anunsia i mina' dos-na misterio ya tattiyi taimanu i Finenena na misterio.
11. Yanggen esta todú i singko (5) pat i kinse (15) na misterio monhayán, taitai Satbe (Si Yu'os unginegue)

I Siñat i Kilu'os +

Put i siñat i Santos Kilu'Os, na' fan libre ham nu i enimigonmane. Yu'os Sainan-mami. Gi na'an i Tata, yan i Lahi-ña yan i Espiritu Santo. Amen.

I KREDO.

Manhongge yu' as Yu'os Tata Ni todú ha' Ha na'siña, na Ha na'huyong i langet yan i tano'. Yan as Jesukisto, i guiya ha' Lahi-ña na Saina-ta na mamapotge'-ñaihon ginen i fina' tinas yan grasian i Espiritu Santo; finaño nu i Bithen as Santa Maria; masapet gi papa' i sisiñan Ponsio Pilato; maklaba gi kilu'os, matai ya mahafot; tumunok los enfiernos; mina'-tres Di'as la'la', Talo ginen i entalo' i manmatai; kahulo' gi langet, ya gaige na matata'chong gi agapa' Yu'os Tata ni i todú ha' Hanasiña. Ginen ayu U mamaila' ya U sentensia i manlala'la' yan i manmatai. Manhongge yu' gi Espiritu Santo. Hu hongge i Santa Iklesia Katolika; i kumunion de los santos; i ma'asi'en i isao; i lina'la tataotao talo'; yan i taihinekok na bida. Taiguenao Mohon.

TATAN-MAMI

Tatan-mami, na gaige Hao gi langet, Umatuna i na'an-mu, u mamaila i gubietno-mu, u mafa'tinas i pinto'-mu, a, si i tano' kumu i langet. Na'i ham pa' go ni kada ha'ani agong-mami, ya asi'e ham nu i diben-mami, taiguihi i in asisi'e i dumidibi ham siha, ya cha'mu ham pumopo'lo na in fan basnak gi tentasion lao na'fanlibre ham gi tailayi.

Taiguenao Mohan.

SI YU'OS UNGINEGUE Maria,

Si Yu'os unginegue Maria, bula hao grasia. Si Yu'os gaige giya hagu. Matuna hao entre todus i famalao'an ya matuna i fina'agu-mu as Jesus.

Santa Maria, nanan Yu'os, tayuyuti ham pa'go yan i oran i finatai-mami. Amen.

UMATUNA I TATA,

Umatuna i Tata, yan i Lahi-ña, yan i Espiritu Santo.

Taiguihe i tutuhon-ña, pa'go yan sienpre yan i manaihinekok na ha'ani.

I Tinaltai Fatima (Sagan an monhayan un taltai)

umatuna i tata, gi utimon i misterio (O JESUS-HU,)

O Jesus-hu asi'e ham nu i isao-mami na'fanlibre ham gi guafen sasalaguan. Konne' todu i anti guatu gi langet espisiatmente i mas numisisita i mina'ase'-mu.

TINAYUYOT GI ME'NAN I KRUSIFIHO,

Atan yu' guini maolek yan sen mames Jesus, na dumidimu yu' umitde gi me'nan i mata' mu; ya hu gagagao yan hu tatayuyot Hao nu todu i hinalom-hu, na un na'cheton gi kurason-hu. tinangan hinengge, ninangga yan ginefei'e yan magahet na sinetsot nu i isao-hu siha yan meton na minito' mumaolek; gigon ha' hu hasayaihon yan hu atituyi taimanu i nina' siñan i anti-hu na ginefli'e' i singko na dini lok giya hagu; hu hahasso ayu i hagas sinangan i santos na Prufetu as Dabid nu hagu! "Ma dulok yan manafan adotgan i kannai-hu yan i addeng-hu; ya siña ha' man matufong todus siha i te'lang-hu." Amen.

FINE'NANA NA MANNA'MAGOF NA MISTERIU

1

Annai si Santa Maria sinangani nu i anghet
as Gabret, na para guiya i nanan i Lahen
Yu'os. Simbulon Umidde.

Entension i tinayuyot

Actsepta i pinto' Yu'os.

TATAN-MANI

1. Nina'hanao as Yu'os i anghet as Gabret
guatu gi un bithen gi gima' Dabid, Na'an-ña
este na bithen Si Maria, San Lucas 1:26..27

SI YU'OS UNGINEGUE, Maria,

2. Ilekña i anghet as Maria, "Na'magof hao, O
senmatuna yan guaiyayon na finañagu. Si yu'os
u gaije giya hagu," San Lucas 1:28

SI YU'OS UNGINEGUE, Maria,

3. Gof Maa'nao yan inestotba si Maria ni' sinangan
i anghet, ya nina'manman hafa este siha na palabras
kumeke' ilek-ña. Lucas 1:29

SI YU'OS UNGINEGUE, Maria,

4. Sinangani ni i anghet: "Cha'mu ma'a'a'nao
Maria, sa' un sodda' fabot ginen as Yu'os."
San Lucas 1:30

SI YU'OS UNGINEGUE, Maria,

5. Siempre hao un mapotge' ya un fañagu un patgon
lahi, ya un fa' na'an gui' Jesus, San Lucas 1:31

SI YU'OS UNGINEGUE, Maria,

6. U tat kilo' gue' ya u ma agang, Lahen Yu'os.
ya i raino-ña u taifinakpo', San Lucas 1:32..33

SI YU'OS UNGINEGUE, Maria,

7. Ilek-ña si Maria nu i anghet, "Hafa Taimanu
para uma susedi este ni' taya tiningo'hu Taotao ?"
San Lucas 1:34

SI YU'OS UNGINEGUE, Maria,

8. I Anghet ilek-ña, "I Espiritu Santo u tunok papa'
qiya hago, ya i Todu Hana'siña un gine'helu'he,
San Lucas 1:35

SI YU'OS UNGINEGUE, Maria,

9. I patgon ni' para un fañagu u ma' agang Jesus,
Lahen Yu'os pat (Jesuskristo). San Lucas 1:35

SI YU'OS UNGINEGUE, Maria,

10. Ilek-ña si Maria, "Guahu i tentago' i Yu'us.
na huyong giya guahu taimanu ha' i sinangan-mu,
ayo nai na dingu gui' nai anghet. San Lucas 1:38

SI YU'OS UNGINEGUE, Maria,

UMATUNA I TATA; O JESUS-HU.

Rainan i pas; tayuyuti ham.

MINA' DOS NA MANNA'MAGOF NA MISTERIU

binisitan Santa Maria as Santa Isabe.

Entenslon i tinayuyot

Ta na'i grasia si yu'os put i finatto-ña giya hita ginen as Santa Maria.

TATAN-MAMI

1. Humanao si Maria guatu gi sengsong Judea ni' gaige gi sabana. Humalom gi gima' Zacarias ya ha saluda si Isabe, San Lucas 1:39-40

SI YU'OS UNGINEGUE, Maria,

2. Annai si Isabet ha hungok i saludon Maria, kumalanten i patgon gi tiyan-ña, Bumula inina si Isabel nu i Espiritu Santo. San Lucas 1:41

SI YU'OS UNGINEGUE, Maria,

3. Umessalao a'gang i bos-ña, "Matuna hao entre todú i famalao'an yan Matuna i patgon nu i para un fañagu! San Lucas 1:42

SI YU'OS UNGINEGUE, Maria,

4. Ya gi ayu na mumento annai oppan gi talanga-hu i sunidon i saludu-mu i patgon gi tiyan-hu kumalanten put minagof, San Lucas 1:44

SI YU'OS UNGINEGUE, Maria,

5. Ilek-ña si Maria, "I anti-hu ha tutuna i tinakkilo' i Saina, I espiritu-hu mañodda minagof gi as Yu'os i Satbadot-hu. San Lucas 1:46-47

SI YU'OS UNGINEGUE, Maria,

6. Sa' ha li'e' i inimitden i tentago'-ña; desde pa'go para mona todú Henerasion u agang yu' dichosa. San Lucas 1:48

SI YU'OS UNGINEGUE, Maria,

7. "Umatuna hao sa' un hongge na u makumple giya hagu i sinangan i Saina." Lucas 1:45

SI YU'OS UNGINEGUE, Maria,

8. Ha fa'nu'e hit nu i minetgot ninasinan i kannai-ña, Ha chalapon banida yan i mina'gas i hinasso yan i kurason, San Lucas 1:51

SI YU'OS UNGINEGUE, Maria,

9. Ha na' fanunok i man ma'gas gi tronon-ñiha, ya ha hatsa i manumitde. San Lucas 1:52

SI YU'OS UNGINEGUE, Maria,

10. Sumaga si Maria tres meses, despues humanao tatte para i gima'-ña. Lucas 1:56

SI YU'OS UNGINEGUE,

UMATUNA I TATA; O JESUS-HU,

Rainan i pas; tayuyutl ham.

MINA' TRES NA MANNA'MAGOF NA MISTERIU

3

Annai mafañagu i Lahen Yu'os

Entension i tinayuyot

Ta fan mana yuyot para i giniha yan grasia,
ya ta eyak i Sagrada Familia kosaki siñai hit
mas man hihot as yu'os,

TATAN-MAMI

1. Mientras gaige si Maria yan Jose giya
Belen, matto i ora annai para u ma fañagu
i patgon as Jesus, San Lucas 2:6

SI YU'OS UNGINEGUE, Maria,

2. Un fañagu lahi ya u mafa'na'an Jesus
sa' guiya para u na'fansafo' i taotao siha
gi isao. San Mateo 1:21

SI YU'OS UNGINEGUE, Maria,

3. Manmasusedi este siha, para u makumple i
fino' i Saina ni' sinangan i prufeta, Mateo 1:22

SI YU'OS UNGINEGUE, Maria,

4. "Un bithen u mapotge' ya u fañagu lahi,
ya u ma'agang gue Emanuel" (Na Kumeke ilek-ña,
"Manhihita yan si Yu'os") Mateo 1:23

SI YU'OS UNGINEGUE, Maria,

5. Ilek-na i Anghet nu siha, "Cha'-miyu fan
ma'a'a'ñao, Hu chulili'e' hamyo maolek na
nostisia, para u nina'fan magof todú i taotao
siha. San Lucas 2:10

SI YU'OS UNGINEGUE, Maria,

6. Pa'go mismo na ha'ani gi sengsong David
mafañagu i Satbadot miyo, Guiya i mesias yan
Saina. San Lucas 2:11

SI YU'OS UNGINEGUE, Maria,

7. "U matuna si Yu'os giya hululo' gi langet,
yan pas para i taotao gi tano' sa ayu nai gaige
si Yu'os i minagof-ña." San Lucas 2:14

SI YU'OS UNGINEGUE, Maria,

8. Tres Reyes ginen i Sankatan man matto giya
Jerusalem, manhalom ya mali'e' i patgon yan si
Maria i nana-ña, San Mateo 2:1...11

SI YU'OS UNGINEGUE, Maria,

9. Mandimu ma' adora yan mana'i gui' regalu-ña
Oru, Insensio, yan Mirra. San Mateo 2:11

SI YU'OS UNGINEGUE, Maria,

10. Si Maria ha sostiene este siha na fina'pos,
gi Kurason-ña. Lucas 2:19

SI YU'OS UNGINEGUE, Maria,

UMATUNA I TATA; O JESUS-HU.

Rainan i pas; tayuyuti ham.

MINA' KUATRO NA MANNA'MAGOF NA MISTERIU

4

I ma prisentan i patgon as Jesus gi gimayu'os.

I konsagrasion Jesus para as Yu'os Tata,

Entension I tinayuyot

Ta aksepta i patten Maria annai ha na' fan entalo' hit gi inaksepta-ña nu i pinto' Yu'os.

TATAN-MAMI

1. Matto i tiempo annai si Jose yan si Maria debi di u ma kumple i tinago' Moises ni' para u ma na'fangasgas siha. I dos makonne' i patgon guatu giya Jerusalem para u ma presenta gue' gi Saina. San Lucas 2:22

SI YU'OS UNGINEGUE, Maria,

2. Sumasaga giya Jreusalem un taotao i na'an-ña si Simeon. Maolek, sinantusan, yan gai mina'a'ñao as Yu'os. Sinenggue gue' lokkue ni i Espiritu Santo. Lucas 2:25

SI YU'OS UNGINEGUE, Maria,

3. Nina'.tungo' nu i Espiritu Santo na ti u matai asta ki ha li'e' I Mesias, i Saina. Lucas 2:26

SI YU'OS UNGINEGUE, Maria,

4. Bula espiritu si Simeon annai matto gi templo, I mañaina yan i patgon as Jesus para u cho'gue i Kustombre sigun gi lai. Ha hogue gi Kannai-ña, i patgon ha hatsa hulo' ya ha na'i i Saina grasia yan bendision. San Lucas 2:27-28

SI YU'OS UNGINEGUE, Maria,

5. "Pa'go Saina, sina unna' pas i hinanao-ña i tentago'-mu sigun gi sinangan-mu. San Luca 2:29

SI YU'OS UNGINEGUE, Maria,

6. Sa' i mata-hu mismo lumi'e' i satbasion ginen hagu, nu i un prepara gi me'nan i inatan todú i taotao siha. San Lucas 2:30-31

SI YU'OS UNGINEGUE, Maria,

7. Mambinendisi as Simeon ya ilek-ña as Maria, "Este na patgon dinestina as Yu'os para i pineddong yan i Kinahulo' meggai giya Israel, siñat nu i u ma kontradisi. San Lucas 2:34

SI YU'OS UNGINEGUE, Maria,

8. Hagu un inadotgani un espada, ya ayu siempre na i hinallom i meggai na hinasso u fan annok." Lucas 2:35

SI YU'OS UNGINEGUE, Maria,

9. Annai monhayan manmakumple i otden i Lai i Saina, manna'lo guatu gi gima'-ñiha giya Galilea gi sengsong Nasaret. San Lucas 2:39

SI YU'OS UNGINEGUE, Maria,

10. Dumangkolo i patgon gi kuetpo yan gi minetgot, bula tinemtóm ya i grasian Yu'os gaige giya guiya. San Lucas 2:40

SI YU'OS UNGINEGUE, Maria,

UMATUNA I TATA; O JESUS-HU.

Rainan i pas; tayuyuti ham.

I malingu yan i masodda' i patgon as Jesus
gi gima'yu'os. Entre i Manmalate Siha.

Entension i tinayuyot

Ta ufresi este para Konbetsion i taotao nu
i mani'isao.

TATAN-MAMI

1. Annai dosse años i idat-ña si Jesus manhanao
para u fañaonao gi selebrasion kumo kostumbren-
ña. San Lucas 2:42

SI YU'OS UNGINEGUE, Maria,

2. Makpo' i gipot ya annai man hanao tatte para
i gima'-ña i dos saina ti matungo' na sumaga
si Jesus giya Jerusalem. San Lucas 2:43

SI YU'OS UNGINEGUE, Maria,

3. Hinasson-ña na sasaonao si Jesus gi
batkadan taotao ma konsigi ha' i biachen-ña
ma a'atan gue' entre i mamparientes yan i
manatungo' siha. San Lucas 2:45-46

SI YU'OS UNGINEGUE, Maria,

4. Annai ti masodda' gui mana'lo tatte Jerusalem
para u maespiha, I mina' tres dihas na ma sodda'
gui' gi templo, San Lucas 2:46

SI YU'OS UNGINEGUE, Maria,

5. Todu i humungok gue' nina'fan manman nu i
tinemtom-ña yan i ineppe-ña siha. San Lucas 2:47

SI YU'OS UNGINEGUE, Maria,

6. Ilek-ña si nana-ña nu guiya, "Lahi-hu hafa
na un fa'tinas este nu hami? Gof chathinasso ham
yan si tata-mu annai inaliligao hao." San Lucas 2:48

SI YU'OS UNGINEGUE, Maria,

7. Ilek-ña si Jesus nu siha, "Hafa na in aliligao
yu'? Ada ti in tingo' na debi di bai hu espiha i
checho i Tata-hu?" San Lucas 2:49

SI YU'OS UNGINEGUE, Maria,

8. Lao ti makomprende hafa mansinangane siha.
San Lucas 2:50

SI YU'OS UNGINEGUE, Maria,

9. Manhanao siha tatte Nasaret ya umosgon si Jesus
nu siha trenta años. San Lucas 2:51

SI YU'OS UNGINEGUE, Maria,

10. Si nana-ña ha sostiene todun este siha gi kurason-
ña, Si Jesus fumayi yan tumomtom mas ki i idat-ña ya
mas fumabot gi menan Yu'os yan i Taotao, San Lucas 2:52

SI YU'OS UNGINEGUE, Maria,

UMATUNA I TATA; O JESUS-HU.

Rainan i pas; tayuyuti ham.

I manayuyot Jesukristo gi uetto.

Entension i tinayuyot

Nihi ta tayuyuti todū siha i mañatsaga yan i manmamadedesi.

TATAN-MAMI

1. Si Jesus yan i mandisipulu-ña manmatto gi un lugat ni i mafa'na'an Getsemani. Ha tutuhon muma'añao yan puminiti. San Mateo 26:36-37

SI YU'OS UNGINEGUE, Maria,

2. Ilek-ña nu siha, "Gof piniti i Kurason-hu tanto lokkue' put i finatai. Fañaga guini ya fambela yan guahu." San Mateo 26:38

SI YU'OS UNGINEGUE, Maria,

3. Ha dingū siha, dumimu papa' ya manaitai. San Lucas 22:41

SI YU'OS UNGINEGUE, Maria,

4. "Tata, yanggen siña un na' suha este na Kalis giya guahu. lao ahe' ti i malago'-hu ha na i malago'-mu u macho'gue." San Lucas 22:42

SI YU'OS UNGINEGUE, Maria,

5. Finatoigue gui' ni un anghet ginen i langet para unina'lametgot'. San Lucas 22:43

SI YU'OS UNGINEGUE,

6. Despues di umagoni'as manayuyot fehmanan ya i masahalom-ña mama' haga' ya tutuho' gi edda. San Lucas 22:43

SI YU'OS UNGINEGUE, Maria,

7. Atan ha' matto esta i ora annai para u ma entrega i Lahen i Taotao, guatu gi nina' siñan i mani'isao na taotao. San Lucas 22:44

SI YU'OS UNGINEGUE, Maria,

8. "Sa' hafa na ti siña hamyo mambela un ora yan guahu? San Mateo 26:40

SI YU'OS UNGINEGUE, Maria,

9. Fambela yan fan manayuyot kosa ki ti en fambasnak gi tentasion. I espiritu malago' lao i sensen ñaba'. San Mateo 26:41

SI YU'OS UNGINEGUE, Maria,

10. "Amigu cho'gue hafa dipotse i un fatoigue. Man malak guatu giya guiya maaresta si Jesus ya ma gef go'te gui." San Mateo 26:41

SI YU'OS UNGINEGUE, Maria,

UMATUNA I TATA; O JESUS-HU.

Rainan i pas; tayuyuti ham.

MINA' DOS NA MANNA'PINITI NA MISTERIU 7

Annai masaolak gui'gi haligi.

Intenslon I tinayuyot

Nihi ta ufresi yan ta na'i grasia put i sakri-
fision i Sainata sa' put i guinaiya' ña nu hita,
TATAN-MAMI

1. Magodde si Jesus, ya makonne' guatu gi as
Pilatos. Finaisen gui' as Pilatos, "Kao hagu i
Rai i manhudios siha?" San Marcus 15:1-2

SI YU'OS UNGINEGUE, MARIA,

2. Ineppe as Jesus "I raino-ku taigue guini gi
tano'. I rason na mafañagu yan matto yu' guini
gi tano' para hu testiguyi i minagahet. maseha
hayi i kumumite gui gi minagahet ha hungok i
bos-hu." San Juan 18:36---37

SI YU'OS UNGINEGUE, MARIA,

3. "Desde pa'go mo'na, i Lahen i Taotao u fata'
chong gi agapa' i minina'siña na Yu'os.
Luke 22:70

SI YU'OS UNGINEGUE, MARIA,

4. Todu manmamaissen Hagu i Lahen Yu'os? Man
ineppe siha, Hamyo sumangan na Guahu Gui'?
San Lucas 22:70

SI YU'OS UNGINEGUE, MARIA,

5. Si Pilatos ha konne' si Jesus ya ha na'
masaolak gui'. San Juan 19:1

SI YU'OS UNGINEGUE, MARIA,

6. Ya annai mafa'aila' gue nu i manma'gas
mamale' yan i manamko' siha, Si Jesus
mamatkikilo' ha'. San Mateo 27:12

SI YU'OS UNGINEGUE, MARIA,

7. "Ha cho'gue este put i para u makumple i
prufeta as Isaiah." "Guiya kumatga i chetnot-
ta yan ha na'fan homlo' hit ni manmalangu."
San Mateo 8:17

SI YU'OS UNGINEGUE, MARIA,

8. "Taya' fuetsa-mu giya guahu yanggen ti
mana'i hao ginen hilo. San Juan 19:11

SI YU'OS UNGINEGUE, MARIA,

9. Ma bendas i mata-ña ya ma patmada Ma
faisen, "Hayi pumatmada hao?" San Lucas 23:64

SI YU'OS UNGINEGUE, MARIA,

10. Annai monhayan si Pilatos, ha na' masaolak
si Jesus, Ha intrega guatu gi taotao para u
maklaba gi kulu'os. San Marcus 15:15

SI YU'OS UNGINEGUE, MARIA,

UMATUNA I TATA; O JESUS-HU,

Rainan i pas; tayuyuti ham,

I makorona-ña laktos.

Entension i tinayuyot

Ta tayuyuti todū i mang gai pinadesi sa' put
mama renunsia, mana fanmamahlao yan manma-
botleleha.

TATAN-MAMI

1. I sendalu siha makonne' gui para i lattalom
na lugat ni ma'a'agang praetorium; ya gi mismo
tiempo ma na'fanetnon i sendalu. San Marcus 15:16

SI YU'OS UNGINEGUE, MARIA,

2. Ma na'minagagu gue' kulot lila, despues
manmanufok kuronan laktos ya mapo'lo gi
ilu'-ña. San Marus 15:17

SI YU'OS UNGINEGUE, MARIA,

3. Ma tutuhon masaluda gui', "Biba! Rai i
Judios siha!" San Marcus 15:18

SI YU'OS UNGINEGUE, MARIA,

4. Ya sigi ha', ma, addak i ilu-ña ni pi'ao ya
mato'la'i gui, mankottisisi'a gi me'na-ña
kado' marebererensia gui'. San Marcus 15:19

SI YU'OS UNGINEGUE, MARIA,

5. Ilek-ña si Pilatos nu i linahyan taotao, "Atan ha',
hu konne' gui' huyong para en tingo' na ti husodda'
hafa na isao pat tinailaye fina' tinas-ña." San Juan 19:4

SI YU'OS UNGINEGUE, MARIA,

6. Humuyong si Jesus makurorona ni kuronan
laktos yan ma na'minagagu ni magagon lila,
ya ilek-ña, "Atan i Taotao!" San Juan 19:5

SI YU'OS UNGINEGUE, MARIA,

7. Gigon ma li'e' Gui' nu i manma'gas mamale'
yan i guatdiha siha manessalao, "Klaba Gui!
Klaba Gui!" San Juan 19:6

SI YU'OS UNGINEGUE, MARIA,

8. Manfinaisen as Pilatos, "Sa' hafa? Hafa na
tinailayi ha kuniti. Maessalao mas a'gang,
"Klaba Gui!" San Marcus 15:14

SI YU'OS UNGINEGUE, MARIA,

9. Ilek-ña si Pilatos nu siha, "Kao bai hu
klaba i Rai-miyu?. San Juan 19:15

SI YU'OS UNGINEGUE, MARIA,

10. Ha entrega Gui' guatu giya siha para
Uma klaba. San Juan 19:16

SI YU'OS UNGINEGUE, MARIA,

UMATUNA I TATA: O JESUS-HU.

Rainan i pas; tayuyuti ham.

I ma apagayen i kilu'os guatu gi Katbariu
Entenslon i tinayuyot

Ta tayuyuti i manmamadedesi, i manmahahalang
yan i mansinsasaga.

TATAN-MAMI

1. Yanggen hayi malago' dumalalaki yu' u yute i
guinaha-na, u apagaye i Kiluos-ña ya u tattiye yu'.
San Lucas 9:23

SI YU'OS UNGINEGUE, MARIA,

2. "Hayi sumatba i lina'la'-ña siempre hana'
falingu, ya hayi muna' falingu i lina'la'-ña put
guahu siempre u satba i lina'la'-ña. San Lucas 9:24

SI YU'OS UNGINEGUE, MARIA,

3. Ha apagayi na maisa i Kilu'os manhanao para
i lugat nu i mafa'nana'an "Lugat i Kalabera",
(Golgotha fino' Hebrew.) San Juan 19:17

SI YU'OS UNGINEGUE, MARIA,

4. Chile' i yugu-hu ya en ima gi apagan-miyu ya
en fan manungo' ginen guahu. San Mateo 24:37

SI YU'OS UNGINEGUE, MARIA,

5. Sa' kariñosu yan humitde i kurason-hu. I anten
-miyu siempre u fanmañodda' deskanso. San Mateo 11:29

MARIA, SI YU'OS UNGINEGUE,

6. Sa' i yugu-hu ni para bai na'i hamyo ti
mappot, ya i katga ni para bai po'lo gi hilo'-
miyu nahlalang. San Mateo 11:30

SI YU'OS UNGINEGUE, MARIA,

7. Ya quahu bai entrega hamyo nu i raino nu
esta ha entraga yu' si Tata. San Lucas 22:29

SI YU'OS UNGINEGUE, MARIA,

8. Put los uttimos ilek-ña si Jesus, "Taiguenao
ha' para trata-ña si Tata gi langet nu hamyo
yanggen ti kada unu giya hamyo en asi'i i che'
lon-miyu ginen i kurason-miyu." Mateo 18:35

SI YU'OS UNGINEGUE, MARIA,

9. Siempre mañocho yan manginegue hamyo gi
lamasa-hu ya en fan mata'chong gi tronon i
Raino-ku. San Lucas 22:30

SI YU'OS UNGINEGUE, MARIA,

10. "Tata, gi Kannai-mu na hu entrega i
espíritu-hu, Luke 23:46

SI YU'OS UNGINEGUE, MARIA,

UMATUNA I TATA; O JESUS-HU.

Rainan i pas; tayuyuti ham.

I inatani gi Kilu'os yan i finatai i Saina'ta as Jesukristo.

Entenslon i tinayuyot

Ta fan manayuyot para i mina' asi'e', yan para grasia nu i siña lokkue' ta fan manasi'e'.

TATAN-MAMI

1. Ilek-ña si Jesus, "Tata, asi'i siha: ti matungo' hafa machocho'gue." San Lucas 23:34

SI YU'OS UNGINEGUE,MARIA,

2. Unu gi Kriminat ilek-na, "Jesus, hahasso yu' yanggen matto hao gi raino-mu." Ineppe as Jesus, "Bai asigura hao; na pa'go na haani uta hita na dos giya paraisu." San Lucas 23:42-43

SI YU'OS UNGINEGUE,MARIA,

3. Annai ha li'e' si nana-ña yan i ha guaiya na disipulu ilek-ña, "Palao'an enague' i lahi-mu." San Juan 19:26

SI YU'OS UNGINEGUE,MARIA,

4. Despues ilek-ña nu i disipulu, "Enague' si nana-mu." Desde ayu na ora i disipulu ha konne' gue' gi inadahi-ña. San Juan 19:27

SI YU'OS UNGINEGUE,MARIA,

5. Ya gi oran alas tres umessalao si Jesus a'gagang, "Eli! Eli! lama sabachthani?" Ku'meke ilek-ña Yu'os hu'. Yu'os-hu! Hafa na un dingi yu'?" San Mateo 27:46

SI YU'OS UNGINEGUE,MARIA,

6. Despues di ennao si Jesus ha tungo' na esta todū monhayan ilek-ña put i para umakumple i Eskreptura, "Ma'ho yu'." San Juan 19:28

SI YU'OS UNGINEGUE,MARIA,

7. Despues di ha taña' i binu ilek-ña "Esta monhayan." Tumekon i ilu-ña ya ha entrega i espiritu-ña. San Juan 19:30

SI YU'OS UNGINEGUE,MARIA,

8. Umessalao si Jesus a'gagang ya ilek-na, "Tata, gi Kannai-mu na hu entrega i espiritu-hu." Despues di ha sangan este matai si Jesus. San Lucas 23:46

SI YU'OS UNGINEGUE,MARIA,

9. Esta hihot talo'ani, un hinehom tumampe todū i tano' asta despues di talo ani sa' Kinilis i atdao. Matitek ta'lo' i kottina gi templo. San Lucas 23:44-45

SI YU'OS UNGINEGUE,MARIA,

10. Machule' i tataotao Jesus mabalutan magagu, mana'yi paopao ya mahafot, sigun gi kostumben i man Judios. San Juan 19:40

SI YU'OS UNGINEGUE,MARIA,**UMATUNA I TATA: O JESUS-HU.**

Rainan i pas; tayuyuti ham.

FINE'NANA NA MANMA'LAK NA MISTERIU

I luma'la'-ña ta'lo i Saina-ta as Jesuskristo.
Si Jesus ha ganna i finatai.

Entension i tinayuyot

Ta fan manayuyot gi tinina yan i grasia.

TATAN-MAMI

1. Despues di i Sabalu annai kumekechatangmak
Damenggo, humanao si Maria Magdalena yan i otro
Maria para u ma'atan i naftan Jesus. San Mateo 28:1

SI YU'OS UNGINEGUE, MARIA,

2. "Gotpe ha' luma'la' duru; un anghet i Saina
tumunok ginen i langhet, ha na'galilek tatte
i acho'ya mata'chong." San Mateo 28:2

SI YU'OS UNGINEGUE, MARIA,

3. I Anghet ha kuentusi i famalaoan. Ilek-ña,
"Cha'-miyu fan ma'a'anao. Hu tungo' ha na en
aliligao si Jesus ni maklaba gi Kilu'os.
Taigue gui' guini, esta luma'la' ta'lo, taimanu
ha' i sinangan-ña. San Mateo 28:5-6

SI YU'OS UNGINEGUE, MARIA,

4. "Esta Gui' mana'la'la' ginen i finatai, ya gua-
guaguatu Galilea mofo'na ki hamyo." San Mateo 28:7

SI YU'OS UNGINEGUE, MARIA,

5. Gi pupuengen ayu na ha'ani annai i mandesipulu
mandaña, matto si Jesus ya tumohge gi me'nan-ñiha ya
ilek-ña, "I pas u gaige giya hamyo." San Juan 20:19

SI YU'OS UNGINEGUE, MARIA,

6. Gi linihan yan i mina'a'ñao-ñiha, hinasson-ñiha
na manmanlili'e' siha fafa'ñague. San Lucas 24:37

SI YU'OS UNGINEGUE, MARIA,

7. Ilek-ña nu siha, "Hafa na manatborotao
hamyo? Atan i kannai-hu yan i addeng-hu siha,
sen magahet na guahu ha' yu'. San Lucas 24:38-39

SI YU'OS UNGINEGUE, MARIA,

8. Annai monhayan ha sangan este manmagof i
mandesipulu sa' mali'e' i Saina'ta. San Juan 20:20

SI YU'OS UNGINEGUE, MARIA,

9. Ilek-ña ta'lo, "I pas u gaige giya hamyo'
Taimanu ha' na ha na'hanao yu' si Tata, taigue-
nao ha' bai na'fan hanao hamyo." San Juan 20:21

SI YU'OS UNGINEGUE, MARIA,

10. "Guahu i risureksion yan i lina'la', Maseha
hayi ni manhongge nu guahu, achok ha' matai gue'
u la'la', " San Juan 11:25-26

SI YU'OS UNGINEGUE, MARIA,**UMATUNA I TATA; O JESUS-HU,**

Rainan i pas; tayuyutl ham.

MINA' DOS NA MANMA'LAK NA MISTERIU

I hinalom Jesukriso gi langhet. Kahulo' gi langet para u pripara lugat para hita.

Entenslon i tinavuyot

Tafan manayuyot para direksion gi lina'la'-ta.

TATAN-MAMI

1. Si Jesus ha konne' i disipulu siha huyong para i fi'on Betania. Ha kahat hulo' i kannai na yan mambinendisi siha. San Lucas 24:50

SI YU'OS UNGINEGUE, MARIA,

2. Lumahihot si Jesus ya ilek-nia nu siha, "Esta ma na'i yu' ni todú i autoridat gi tano' yan gi langet. San Mateo 28:18

SI YU'OS UNGINEGUE, MARIA,

3. Pues fanhanao para todú i lugat ya en fa' disipulu-hu siha takpange siha gi na'an i Tata, i Lahi-nia yan i Espiritu Santo," San Mateo 28:19

SI YU'OS UNGINEGUE, MARIA,

4. Fa'na'gue siha para u ma osge todú i hu tago' hamyo, ya siempre todú i tiempo gagaige yu' giya hamyo, asta i uttimon i tano'." San Mateo 28:20

SI YU'OS UNGINEGUE, MARIA,

5. I taotao ni' manhongge ya ha aksepta i tinakpange u masatba; i taotao ni ti malago' manhongge u ma kondena. San Marcus 16:16

SI YU'OS UNGINEGUE, MARIA,

6. Ayu siha i prumufesa i hinenggen nia maninakompapana nu este siha na siñat; u ma usa i na'an-hu para u fanmandulalak aniti; ufanguentos enteramente mannuebu na lengguahi, u fan homlo' i manmalangu ni mapacha ilon-nia." San Marcus 16:17-18

SI YU'OS UNGINEGUE, MARIA,

7. Ti apmam na ha sangan este mahatsa gue' hulo' gi me'nam matan-nia gi mapagahes ni i tumampe Gue' gi i inatan-nia. I Akton 1:9

SI YU'OS UNGINEGUE, MARIA,

8. "Este na Jesus i manma konne'guan hamyo ufatto talo taimanu ha' i eni'e' annai kahulo' gi langet." I Akton 1:11

SI YU'OS UNGINEGUE, MARIA,

9. Man oppop papa, ma adora Gue' despues mana'lo tatte Jerusalem mambula minagof.

San Lucas 24:54

SI YU'OS UNGINEGUE, MARIA,

10. Despues di mankinuentusi as Jesus, manguinentusi makonne' Gue' hulo' gi langet ya mata'chong gi agapa' Yu'os Tata. San Marcus 16:19

SI YU'OS UNGINEGUE, MARIA,**UMATUNA I TATA; O JESUS-IJU.**

Rainan i pas; tavuyuti ham.

MINA' TRES NA MANMA'LAK NA MISTERIU

I mantinengguen i Apostoles yan si Santa Maria nu i Espiritu Santo.

Entenslon i tinayuvot

Ta gagao i Espiritu Santo ya u umentas mas i nina' i-ña nu hita.

TATAN-MAMI

1. Bai faisen si Tata, ya guiya en fan nina' hana gue otro na Parakletu para en fan hamyo gi todú i tiempo. San Juan 14:16

SI YU'OS UNGINEGUE, MARIA,

2. I Parakletu, i Espiritu Santo ni para u nina' hanao as Tata gi na'an-hu guiya en fan fina' na'gue yan en nina'fan hasso put todú i hu sangani hamyo. San Juan 14:26

SI YU'OS UNGINEGUE, MARIA,

3. "Ti apmam na tiempo en fan matakpange nu i Espiritu Santo." I Akton 1:5

SI YU'OS UNGINEGUE, MARIA,

4. "Siempre en risibi pudet yanggen matto papa' i Espiritu Santo giya hamyo, pues siempre en fan testigu-hu giya Jerusalem yan kontodu asta i puntan tano'." I Akton 1:8

SI YU'OS UNGINEGUE, MARIA,

5. Annai matto i ha'anen Pentekostes, mansinedda' i disipulu mane'etnon gi un lugat. Gotpe ha' matto un dangkulo na buruka Kalan mohon un metgot na manglo' ginen hihilo' gi mapagahes, I Akton 2:1-2

SI YU'OS UNGINEGUE, MARIA,

6. Kalan hula' guafi mana'anok despues machalapon ya mañaga gi hilo' kada unu giya siha. Mambula todú siha nu i Espiritu Santo. I Akton 2:3

SI YU'OS UNGINEGUE, MARIA,

7. Matutuhon manguentos difirentes lingguahi, manmananunsia manna'manman na sinangan sa' maninayuyuda nu i Espiritu Santo. I Akton 2:4

SI YU'OS UNGINEGUE, MARIA,

8. Ilek-ña si Pedro, "Debi di kada unu giya hamyo u fañotsot ya umatakpange gi na'an Jesukristo kosa ki siña ma as'i' hao ni isao-mu; despues nai un risibi i nina'en i Espiritu Santo. I Akton 2:38

SI YU'OS UNGINEGUE, MARIA,

9. "I prumesa mafa'tinas para hamyo yan i famagu-on-miyu yan todú ayu i manchachago' trabiha lao manina'agang as Yu'os." I Akton 2:39

SI YU'OS UNGINEGUE, MARIA,

10. Todú ayu i umaksepta i fina'na'gue-ña manmatakpange; guaha tres mit na taotao mamatakpange guihi na ha'ani. I Akton 2:41

SI YU'OS UNGINEGUE, MARIA,**UMATUNA I TATA; O JESUS-HU,**

Ralnan i pas; tayuyuti ham.

I Makahat Santa Maria hulo'gi langet. Si Maria dumaña' yan i lahi-ña.

Entension i tinayuyot

Ta tayuyuti todü i manmalefannai'hon na animas, espisiatmente ayu i taya' humahaso siha.

TATAN-MAMI

1. "U takkilo' Gui' ya u ma'agang Lahen i Mas Tatkilo'." San Lucas 1:32

SI YU'OS UNGINEGUE,MARIA,

2. "I Saina as Yu'os u nina'i Gui' ni tronon David i tata-ña, ya u rai Gui' para i famaguon Jacob, para todü i tiempo ya i raino-ña u taifinakpo'." San Lucas 1:33

SI YU'OS UNGINEGUE,MARIA,

3. Un dangkolo na siñat u annok gi langet; i palao'an minagagu nu i atdao; i pilan gi papa' i addeng-ña, ya i ilu-ña makurona nu dosse na estreyas (Pution). Revalation 12:1

SI YU'OS UNGINEGUE,MARIA,

4. Tata, todü ayu i un na'i yu' malago' yu' in fanhahami amanu ha' nai gage yu', San Jn 17:24

SI YU'OS UNGINEGUE,MARIA,

5. "Hu na' matungo' i na'an-mu nu siha, ya bai kontinuha muna'tungo' siha kosaki i ginelli'e' -mu nu guahu u la'la' giya siha, ya bai la'la' giya siha." San Juan 17:26

SI YU'OS UNGINEGUE,MARIA,

6. Ya hagu patgon-hu, un ma'agang prufetan i Mas Tatkilo'; San Lucas 1:76

SI YU'OS UNGINEGUE,MARIA,

7. Para un sangani i taotao-ña siha na para u mana'fanlibre ginen i isao-ñiha, Luke 1:77

SI YU'OS UNGINEGUE,MARIA,

8. Todü este che'cho' i ma'ase' na Yu'os-ta', Siempre ha na'fañila' ma'lak i satbasion gi hilo' ta, Para u fañila' gi ayu siha i manmatata'chong gi hemhom yan gi anineng i finatai, para u giha i addeng-ta guata gi chalan i pas. San Lucas 1:78-79

SI YU'OS UNGINEGUE,MARIA,

9. Todü i gumaiya yu', hu guaiya lokkue'; Hayi uma ligao yu', ha sodda' yu', I sumodda yu' mañodda' li-na'la' yan minaolek ginen as Yu'os; Proverbs 8:17&35

SI YU'OS UNGINEGUE,MARIA,

10. Kahulo', gatbo yan guaiyayon ya maila, Songs of songs 2:10

SI YU'OS UNGINEGUE,MARIA,**UMATUNA I TATA; O JESUS-IJU,**

Rainan i pas; tayuyuti ham.

MINA' SINGKO NA MANMA'LAK NA MISTERIU

I makuronan i Bithen as Santa Maria yan i gine'
hen-ña nu todū siha i Anghet yan i mañantos.
Rainan i Pas yan nanan i Betbo Mama'taotao.

Entension i tinayuyot

Tafan manayuyot para entension Santa Maria,
ya put i guiya nanan Jesukristo yan lokkue'
nana-ta, tagagao ya u na' fañaonao hit ya
u ta fan mana'i mas grasia.

TATAN-MAMI

1. Si Yu'os i todū hana'siña mandangkolo siha fina'-
tinas-ña para guahu, ya santos i na'an-ña. Luke 1:49

SI YU'OS UNGINEGUE, MARIA,

2. Mimilalak i kurason-hu manmaolek na tema yanggen
hu kantayi manlinangitan kanta i Saina. Psalm 45:2

SI YU'OS UNGINEGUE, MARIA,

3. Gatboña hao ki i mas gatbo na finañagon taotao;
Grasia siha malalaknos gi labios-mu, sa si Yu'os ha'
muna' matuna hao taihinekok. Psalm 45:3

SI YU'OS UNGINEGUE, MARIA,

4. Sa' i tagahlo' na graisa parehu ha' gi langet
yan gi tano' taya' nina' huyong yu'os siña gumana
gue'. Vatican II, Constitution of the Church #53.

SI YU'OS UNGINEGUE, MARIA,

5. Guahu i rosat i hinengge, i flores i guinaiya.
Song of Songs 2:1

SI YU'OS UNGINEGUE, MARIA,

6. Pues pa'go hafañelos, Ekungok yu'; I "fina'na'gue"
yan i "tinemtom" munga' ma richasa. Proverbs 8:32-33

SI YU'OS UNGINEGUE, MARIA,

7. Ti hamyo umayek yu', guahu umayek hamyo.
San Juan 15:16

SI YU'OS UNGINEGUE, MARIA,

8. Hamyo lokkue' debi di en fan testigu put
guahu, sa' manhita desde i tutuhon. Juan 15:27

SI YU'OS UNGINEGUE, MARIA,

9. Esta pa'go fan manggagao gi na'an-hu. Fan
manggagao ya siempre en risibi kosa ki kabales
i minagof-miyu. Juan 15:27

SI YU'OS UNGINEGUE, MARIA,

10. Matuna hao haga-hu entre todū i famalao'an gi
tano', ginen i tagahlo' na yu'os. Judith 13:18

SI YU'OS UNGINEGUE, MARIA,**UMATUNA I TATA; O JESUS-HU.****Rainan i pas; tayuyuti ham.****ABE, MARIA PRUISIMA. SIN PEKADO KONSEBIDA**

I SATBE (SI YU'OS UNGINEGUE RAINA)

Si Yu'os unginegue Raina , yan nanan mina'a'se;
lina'la', minames yan ninanggan-mami. Si Yu'os
unginegue. Hagu ina'agang ni manmadestiladon
famaguon Eba. Hagu intatanga, manu'ugong yan
manatanges ham guini gi sagan lago', Guse' nai pues
Saina abogadan-mami; leklek magi enao, i manyo'ase'
na fanatan-mu, ya despues di este i manmadesteladon
-mami na' li'e' ham nu i matunan i finañagu-mu as
Jesus, Asaina sen Yo'ase'; Asaina yini'usan,
Asaina mames na Sempre Bithen as Maria! Tayuyute
ham Santa Nanan Yu'os; para in mirese kumonsigi i
prininmeten i Saina-ta as Jesukristo. Taiguenao Mohon.

Mames na Tinayuyot

Hasso, sen yoase' na Bithen as Maria, na tat na
mahungok na ni unu nu i fumalague pat gumagaohao
nu i sinague-mu ya humuyong unyute'. Hana'gagai
hinalom yu' enao na inanagoko, ya hu falague hao,
Bithen i manbithen siha yan nana-hu matto yu' gi
mena-mu umu'ugong yan mananayuyot. Cha'mu, Nanan
Jesukristo yan nanan i taotao siha sumasala i
tinayuyot-hu siha; maolek-ña, na'li'e' yu' nu i
yine'ase-mu; ya ekungok yu' ho'ye yu'.
Taiguenao Mohon.

as Santa Maria (Memorare)

Fanhasso, o sen yini'usan Bithen Maria!
Na taya' nungka nai mahungok, na ni unu, ni
manmanahude guatu gi ginegue-mu, manmangagao nu i
inasiste-mu yan managang nu i inayuda-mu humuyong
ma'abaandona pot hagu. Guahu lokke' manakuda yo'
yan este na inangokko giya hagu, o nana, Bithen
i mambiten, ya umu'ugong yo'gi papa i minakkat i
isao-hu siha, hu atotga yo' matto gi me'na-mu,
o Nanan Yu'os, cha'-mu dumespreresia siha i
ginagao-hu, antes bien, ekungok yan un risibi kon
kariño. Amen

I Siñat i Kilu'os +

Put i siñat i Santos Kilu'Os, na' fan libre ham nu
i enimigonmane. Yu'os Sainan-mami. Gi na'an i Tata,
yan i Lahi-ña yan i Espiritu Santo. Amen.